



April, 2022. godine, broj 7.

Općina Stari Grad Sarajevo



## Općina Stari Grad i Fondacija Hemiias grade zgradu za socijalno ugrožene

Zahvaljujući saradnji općinskog načelnika mr. Ibrahima Hadžibajrića i uglednog biznismena, humaniste i predsjednika Fondacije Hemiias Hajriza Brčvaka...



VIŠE NA  
LINKU



## Podrška radu Narodne kuhinje Stari Grad na jubilej 30 godina rada

Narodna kuhinja Stari Grad, koja svakodnevno nahrani više od 750 korisnika - socijalno ugroženih građana koji su na rubu egzistencije, obilježila je 30. godišnjicu svog postojanja...



VIŠE NA  
LINKU



## Nagrađeno dvanaest studenata – zlatnih i srebrenih znački

Najbolje studentima iz Starog Grada, dobitnicima zlatnih i srebrenih znački Univerziteta u Sarajevu, načelnik Hadžibajrić dodijelio je plakete i novčane nagrade za izuzetne rezultate koje su postigli...



VIŠE NA  
LINKU



## Načelnik Hadžibajrić u svečanoj predramazanskoj šetnji s najmlađima

Uz podršku Općine Stari Grad u organizaciji Udruženja majki "Brižne ruke" održana je tradicionalna i svečana predramazanska šetnja od starogradskog jezgra do Žute tabije...



VIŠE NA  
LINKU







# Općina Stari Grad i Fondacija Hemiias grade zgradu za socijalno ugrožene

Zahvaljujući saradnji općinskog načelnika mr. Ibrahima Hadžibajrića i uglednog biznismena, humaniste i predsjednika Fondacije Hemiias Hajriza Brčvaka, u općini Stari Grad u ulici Čadordžina gradit će se zgrada u kojoj će biti stambeno zbrinuta djeca bez roditelja i socijalno ugroženi. Izgradnja četvrte socijalne zgrade čija je vrijednost između 800.000 i jedan milion konvertibilnih maraka zajednički je projekat Općine Stari Grad Sarajevo i Fondacije Hemiias, a ugovor o uređenju međusobnih prava i obaveza na ovom projektu potpisali su 04. aprila općinski načelnik mr. Ibrahim Hadžibajrić i direktor Fondacije Hemiias Hajriz Brčvak.

Socijalnu zgradu u ulici Čadordžina u potpunosti će finansirati donator Fondacija Hemiias. Općina Stari Grad osigurala je zemljište za gradnju, svu administrativnu podršku, uključujući građevinsku i urbanističku dozvolu. Gradnja će početi ubrzo, a rok za izvođenje radova je 18 mjeseci. Plan je da krov nad glavom dobije sedam porodica iz Starog Grada, a koje će zajednički odrediti Fondacija „Hemiias“ i Općina Stari Grad.

Hajriz Brčvak uspješni je privrednik i poznati humanista koji je porijeklom iz Bijelog Polja, danas živi i radi u Njemačkoj, a iza sebe ima bezbroj dobrih dijela. Iako je njegova životna priča teška, doživio je i uspone i padove, na kraju je izgradio uspješnu građevinsku firmu, te od svakog ugovorenog posla izdvajao procenat i pomagao one kojima je pomoć najpotrebnija. Tokom pandemije korona virusa uputio je značajnu pomoć u medicinskoj opremi i sredstvima Bosni i Hercegovini, ali drugim zemljama regiona.



Općinski načelnik  
mr Ibrahim Hadžibajrić



Za svaku porodicu siguran krov nad glavom predstavlja najveću potrebu u životu. Nikada nisam upoznao nekoga poput gospodina Hajriza Brčvaka, ko istinski želi da pomogne. Prilikom jednog našeg ranijeg susreta, sam je izrazio želju da se riješi stambeno pitanje onih koji to nikada sami sebi ne bi mogli priuštiti. I, evo nas na početku jedne lijepe i uspješne priče.



Predsjednika Fondacije  
Hemiias Hajriz Brčvak



Drago mi je što mogu da učestvujem u ovakvim stvarima jer čovjek koji daje ne može biti siromah. Zahvalan sam što mi je Uzvišeni pokazao put kojim trebam da idem jer činiti dobro je nešto što se ne može uporediti ni sa čim. Stari Grad sam izabrao zato što sam upoznao načelnika Ibrahima Hadžibajrića i sekretarku Almu Destanović na jednom sastanku i vrlo brzo smo se sve dogovorili. Siguran sam da to nije bio slučajan susret, jer ništa se ne dešava slučajno. Mi smo ljudi koji radimo bez ikakvog interesa, samo zato što volimo ljude i Stari Grad, imamo čist nijet i iskrenu želju da pomognemo i drago mi je da smo se sreli jer sada možemo zajedno učiniti mnogo dobra.



POGLEDAJTE VIDEO PRILOG  
KLIKOM NA IKONICU





# Podrška radu Narodne kuhinje Stari Grad na jubilej 30 godina rada

Narodna kuhinja Stari Grad, koja svakodnevno nahrani više od 750 korisnika - socijalno ugroženih građana koji su na rubu egzistencije, obilježila je 30. godišnjicu svog postojanja. No, ovaj jubilej se nije obilježio svečano. Dok su se građani okupljali u redovima ispred Narodne kuhinje čekajući svoj

obrok, uprava ove javne ustanove i uposleni s nostalgijom su se prisjećali Tetke Zilhe, poznate humanitarke i dugogodišnje upraviteljice koja je umrla 01. oktobra prošle godine. U njenu čast, uprava Narodne kuhinje pripremila je korisnicima posebne poklone upakovane u vrećice s njenim imenom.



## Načelnik Hadžibajrić potpisao ugovor o dodjeli 40.000 KM

A, tradicionalno, na dan osnivanja Narodne kuhinje Stari Grad, općinski načelnik mr. Ibrahim Hadžibajrić posjećivao bi Narodnu kuhinju i sa Tetkom Zilhom dijelio obroke i hedije građanima, te potpisivao ugovor o značajnoj finansijskoj podršci bez koje bi ova kuhinja teško funkcionisala. Tako je bilo i ove godine, a ugovor prema kojem će Općina Stari Grad za Narodnu kuhinju ove godine izdvojiti 40.000 KM potpisali su načelnik Hadžibajrić i predsjednik Udruženja Narodna kuhinja Stari Grad Amir Radeljaš. U posljednjih 13 godina za rad Narodne kuhinje, iz budžeta Općine Stari Grad izdvojeno je više od pola miliona konvertibilnih maraka, a načelnik Hadžibajrić najavio je i nastavak podrške.



Općinski načelnik  
mr Ibrahim Hadžibajrić



Narodna kuhinja obilježava 30 godina rada. Počeli su raditi u vrijeme kada je grad bio pod opsadom i kada nije postojala nijedna ovakva kuhinja u gradu. Narodna kuhinja je tada bila spas za mnoge, a i danas je. Volio bih kada bi se broj korisnika kuhinje smanjivao, ali nažalost to nije tako. Zato moramo svi pomagati, da niko ne ostane gladan i da kuhinja uvijek ima otvorena vrata za sve kojima je potrebna



Predsjednik Udruženja  
Narodna kuhinja Stari  
Grad Amir Radeljaš



Pola godine nakon smrti Tetke Zilhe, u Narodnoj kuhinji Stari Grad uspijevamo da pratimo put koji je ona zacrtala još prije 30 godina. Svakodnevno od 08.30 do 11,00 sati 620 korisnika preuzima svoje obroke u Narodnoj kuhinji, a još 144 obroka nosimo na njihov punkt u Tarčinu. Dok smo mi ovdje niko neće ostati gladan i zato nam je veoma značajna podrška načelnika Hadžibajrića i Općine Stari Grad. Zahvaljujući ovoj pomoći, možemo osigurati i više za naše korisnike.



POGLEDAJTE VIDEO PRILOG  
KLIKOM NA IKONICU





# Nagrađeno dvanaest studenata – zlatnih i srebrnih znački

Najbolje studentima iz Starog Grada, dobitnicima zlatnih i srebrnih znački Univerziteta u Sarajevu, načelnik Hadžibajrić dodijelio je plakete i novčane nagrade za izuzetne rezultate koje su postigli. Ukupno 12 studenata iz Starog Grada dobilo je priznanja, od toga su dvije zlatne i deset srebrnih znački, a prosjek njihovih ocjena kreće se od 9 do 9,99.

Dobitnici zlatnih znački su: Amila Smajić (Pravni fakultet, 9,90) i Kemil Bekteši (Akademija likovnih umjetnosti, 9,55)

Dobitnici srebrnih znački su: Amer Milaimi (Medicinski fakultet, 9,41) Amar Milaimi (Medicinski fakultet, 9,30), Ilma Latić (Pedagoški fakultet, 9,33), Ajla Prnjavorac (Muzička akademija, 9,30), Amra Arapović (Fakultet sporta i tjelesnog odgoja, 9,10), Hana Salihović (Muzička akademija, 9,07), Amina Magoda (Filozofski fakultet, 9,00), Amna Pezo (Fakultet zdravstvenih studija 9,49), Merima Bukva (Farmaceutski fakultet, 9,14), Harun Čehović (Akademija scenskih umjetnosti 9,47).



Općinski načelnik  
mr Ibrahim Hadžibajrić

Općina Stari Grad Sarajevo svake godine izdvaja značajna sredstva za stipendiranje učenika i stidenata iz ove lokalne zajednice. U posljednjih 13 godina za stipendiranje učenika i studenata izdvojeno je oko 3,6 miliona konvertibilnih maraka. Za naše nadarene studente koji su dobitnici zlatne i srebene značke, ali i za ostale, moramo naći načina kako da ostanu ovdje i daju svoj doprins razvoju i promjenama na bolje u našoj državi.



Hana Salihović

Nisam se nadala srebrenoj znački i moj cilj bio je iskazati se što bolje u svojoj profesiji i poslu. I ova srebrna značka mi je bila jedna velika kruna mog rada i zalaganja. Mnogo znači kada dobijemo priznanje za naš rad, pogotovo nama umjetnicima, ovo nam predstavlja veliki doprinos i značaj.



Amer i Amar Milaimi

Mi bismo rekli mladim ljudima danas, pošto su mladi generalno skloni brzom oduštanju, kad vide da nešto ne ide ili kad vide da je potrebno mnogo više rada nego što su spremni da ulože u tom trenutku mi bismo im rekli da se trud zaista isplati. Često nije potrebna prevelika pamet niti prevelika inteligencija, samo je potrebno malo više rada. Ne morate dnevno učiti sate i sate, već svaki dan barem sat i mora se isplatiti. Vjerujte u sebe i nikada ne odustajte



POGLEDAJTE VIDEO PRILOG  
KLIKOM NA IKONICU






# Načelnik Hadžibajrić u svečanoj predramazanskoj šetnji s najmlađima

Uz podršku Općine Stari Grad u organizaciji Udruženja majki "Brižne ruke" održana je tradicionalna i svečana predramazanska šetnja od starogradskog jezgra do Žute tabije, u kojoj je učestvovao i općinski načelnik mr. Ibrahim Hadžibajrić.

Vesela povorka krenula je sa Trga Mala avlija, te kroz Sarače, Bašćaršijski trg i Kovače stigla na krajnje odredište Žutu tabiju. Tu su pušteni baloni, a svi prisutni su pucnjem topa svjedočili početku ramazana, najsvetijeg i najvažnijeg mjeseca za sve muslimane. Čast da aktivi-

ra prvi pucanj iz topa na Žutoj tabiji pripala je općinskom načelniku mr Ibrahimu Hadžibajriću.

Općina Stari Grad od prvih dana pruža podršku Udruženju majki "Brižne ruke". Njihov program je usmjeren na djecu predškolskog uzrasta, tačnije na djecu koja nemaju mogućnost upisa u vrtiće. Za njih se organizuju različite aktivnosti, edukativno-kreativne radionice, kulturne posjete, upoznavanje sa znamenitostima, a sjedište udruženja je u općinskim prostorijama u ulici Mula Mustafe Bašeskije.



Općinski načelnik  
mr Ibrahim Hadžibajrić



Njihov rad definitivno vrijedi, a dokaz je više od 600 učesnika ove šetnje. Djeca se na jako lijep način upoznaju sa našim svetim mjesecom ramazanom. Općina Stari Grad je prepoznala vrijednost ovog udruženja i manifestacije i mi sa zadovoljstvom dajemo podršku



Almira Bičić-Bašić



Željeli smo na neki način našoj djeci približiti ushićenje i radost dolaska ramazana. Mi odrasli to već imamo, ali djeca to razumljivo ne mogu još imati. Međutim, uz jedno veselo okupljanje sa njihovim roditeljima, braćom, sestrama, rodbinom i prijateljima, balone, te pucanj topa na tabiji, djeci Ramazan ostaje u posebnom sjećanju", pojasnila je Bičić-Bašić

